

國學基本典籍叢刊

宋·朱熹 集注

宋本論語集注

4

國家圖書館出版社



國學基本典籍叢刊

宋·朱熹 集注

宋本論語集注

4

國家圖書館出版社

第四冊目錄

卷八	衛靈公第十五		一
	季氏第十六		四五
卷九	陽貨第十七		七五
	微子第十八		一一七
卷十	子張第十九		一四五
	堯曰第二十		一七三

論語卷第八

朱熹集注

衛靈公第十五

凡四十一章

衛靈公問陳於孔子。孔子對曰：「俎豆之事，則嘗聞之矣；軍旅之事，未之學也。」明日遂行。

陳去聲。○陳謂軍師行伍之列。俎豆，禮器。尹氏曰：「衛靈公無道之君也，復

○有志於戰伐之事故答以未學而去之

在陳絕糧從者病莫能興

從去聲。○孔子去衛適陳興起也

子路愠見曰君子亦有窮乎子曰君子固窮小人窮斯濫矣

見賢遍反。○何氏曰濫濫也言君子固窮時不若小人窮則放濫爲非

程子曰固窮者固守其窮亦通。愚
謂聖人當行而行無所顧慮處困而
亨無所怨悔於此可見學者宜深味
之。

子曰賜也女以予爲多學而識之者與
女音汝識音志與平聲下同。子貢
之學多而能識矣夫子欲其知所本
也故問以發之。

對曰然非與

方信而忽疑蓋其積學功至而亦將
有得也

曰非也予一以貫之

說見第四篇然彼以行言而此以知
言也。謝氏曰聖人之道大矣人不
能徧觀而盡識宜其以爲多學而識
之也然聖人豈務博者哉如天之於

衆形匪物物刻而雕之也故曰予一
以貫之德輶如毛毛猶有倫上天之
載無聲無臭至矣尹氏曰孔子之於
曾子不待其問而直告之以此曾子
復深喻之曰唯若子貢則先發其疑
而後告之而子貢終亦不能如曾子
之唯也二子所學之淺深於此可見
愚按夫子之於子貢要有以發之而

他人不與焉則顏曾以下諸子所學之淺深又可見矣

子曰由知德者鮮矣

鮮上聲。由呼子路之名而告之也。德謂義理之得於己者非已有之不能知其意味之實也。自第一章至此疑皆一時之言此章蓋爲愠見發也

子曰無爲而治者其舜也與夫何爲哉
恭己正南面而已矣

與平聲夫音扶。無爲而治者聖人
德盛而民化不待其有所作爲也獨
稱舜者紹堯之後而又得人以任衆
職故充不見其有爲之迹也恭己者
聖人敬德之容旣無所爲則人之所
見如此而已

子張問行

猶問達之意也

子曰言忠信行篤敬雖蠻貊之邦行矣
言不忠信行不篤敬雖州里行乎哉
行篤行不之行去聲貊亡百反。子
張意在得行於外故夫子反於身而
言之猶答干祿問達之意也篤厚也
蠻南蠻貊北狄二千五百家爲州

立則見其參於前也在輿則見其倚於
衡也夫然後行

參七南反夫音扶。其者指忠信篤
敬而言參讀如母往參焉之參言與
我相參也衡輓也言其於忠信篤敬
念念不忘隨其所在常若有見雖欲
頃刻離之而不可得然後一言一行
自然不離於忠信篤敬而蠻貊可行

也

子張書諸紳

紳大帶之垂者書之欲其不忘也。
程子曰學要鞭辟近裏著已而已博
學而篤志切問而近思言忠信行篤
敬立則見其參於前在輿則見其倚
於衡只此是學質美者明得盡查滓
便渾化却與天地同體其次惟莊敬

以持養之及其至則一也

子曰直哉史魚邦有道如矢邦無道如矢

史官名魚衛大夫名鮒如矢言直也
史魚自以不能進賢退不肖旣死猶
以尸諫故夫子稱其直事見家語

君子哉蘧伯玉邦有道則仕邦無道則
可卷而懷之

伯玉出處合於聖人之道故曰君子
卷收也懷藏也如於孫林父甯殖放
弑之謀不對而出亦其事也。楊氏
曰史魚之直未盡君子之道若蘧伯
玉然後可免於亂世若史魚之如矢
則雖欲卷而懷之有不可得也
子曰可與言而不與之言失人不可與
言而與之言失言知者不失人亦不失

言

知去聲

子曰志士仁人無求生以害仁有殺身以成仁

志士有志之士仁人則成德之人也
理當死而求生則於其心有不安矣
是害其心之德也當死而死則心安
而德全矣。程子曰實理得之於心

自別實理者實見得是實見得非也
古人有捐軀墮命者若不實見得惡
能如此湏是實見得生不重於義生
不安於死也故有殺身以成仁者只
是成就一箇是而已

子貢問爲仁子曰工欲善其事必先利
其器居是邦也事其大夫之賢者友其
士之仁者